

gis pacifici. Et contra delinquentes procedunt Inquisitores. ibidem.

Tertio. In publicis Concionibus, lectionibus, Conclusionibus, asseri non potest, quod B. Virgo fuerit concepta cum peccato originali. Paulus V. Constitut. 105. quæ incipit: *Sanctissimus*. Et poenæ eadem sunt, quas statuit Xistus IV. in citata Constitutione. Declarat tamen idem Pontifex Paulus V., quod per hoc non intendit asserere præjudicium sententiæ asserenti, quod concepta sit cum originali, sed relinquit eam in statu suo. Et qui tenent oppositam in actis publicis, scilicet Concionibus, vel lectionibus, non possunt impugnare eam, quæ dicit, quod cum originali fuit concepta, neque de eâ possunt tractare. Idem Paulus V. citata Constitutione. Et Inquisitores procedunt contra ipsos inobservantes.

Quarto. Nullus, neque secularis, neque regularis audeat neque private, sive in sermonibus sive in scriptis, asserere, quod B. Virgo fuerit concepta cum peccato originali. Gregorius XV. Constit. 29. quæ incipit: *Sanctissimus*. Subdens, quod per hoc non intendit reprobare opinionem hanc, neque ullum ei præjudicium asserere. In eadem Constitut. §. 2. Denique præcipit, ut Officium Conceptionis B. Mariæ non possit sub alio titulo, vel nomine celebrari in citata Constit. §. 4. Volens quoque, quod contrafaciens ab Ordinariis, & Inquisitoribus sint puniendi. In eadem Constitut. §. 6.

Quinto. Idem Gregorius XV. in additione ad præfatam Constitutionem 29. concedit Patribus Ordinis Prædicatorum, ut in privatis suis sermonibus, inter se, & non cum aliis, nec inter alios, possint tractare, & discurrere, an B. Virgo fuerit Concepta cum peccato originali.

Arguunt I. In instanti priori naturæ fuit B. Virgo filia Adæ, quanvis sanctificata; sed in illo priori habuit debitum contrahendi peccatum originale: ergo de facto prius habuit originale peccatum, quam ab eo liberaretur; quod idem est ac dicere si in illo priori naturæ habuit debitum contrahendi, contraxit. **II.** In illo priori naturæ, in quo præintelligitur ad gratiam, B. Virgo non habuit justitiam, nec concipitur ut justa: ergo debet necessario concipi ut injusta, vel ut non justa, ac proinde habens debitum, & habens originale peccatum. **III.** Hoc debitum, quod habuit B. Virgo contrahendi originale peccatum, vel fuit debi-

tum proximum, vel remotum; si proximum, est ipsum peccatum originale; si remotum, hoc non est aliud, quam quod B. Virgo habuerit carnem Adæ; at qui etiam Christus habuit carnem Adæ, quia habuit carnem Mariæ, quæ est caro Adæ: ergo nullum est discrimen inter Christum, & Mariam, quo ad originale peccatum, vel quo ad debitum contrahendi illud. **IV.** B. Virgo vel fuit liberata a debito contrahendi, vel ab ipsa contractione; si a debito contrahendi, nullum habuit debitum contrahendi originale; si ab ipsa contractione, hoc implicat, quia idem esset ac habere debitum, & non habere contractionem, scilicet habere debitum, & non solvere.

Respondemus ad I. cum Frassen, distinguendo *minorem*; habuit illud debitum positive, negatur; habuit illud debitum in illo priori instanti negative, conceditur. Explicatur distinctio ab eodem. Quod competit alicui positive, prius natura, quam aliud, potest affirmari de ipso simpliciter, & pro instanti temporis, in quo existit, & in quo illud instans naturæ includitur. Et hoc pacto posset dici, quod B. Virgo habuisset peccatum originale, & gratiam sanctificantem in eodem instanti temporis, quod dici non potest. Dicitur autem in illo priori instanti habuisse illud debitum negative, quatenus non concipitur habuisse aliquid pro illo instanti naturæ, ratione cujus non deberet contrahere peccatum originale, quia pro illo instanti nondum concipiebatur, ut habens gratiam sanctificantem. Hæc Frassen; qui subdit, quod hæc solutio legitima apparet etiam in sententia Adversariorum, qui non negant, Deum de potentia absoluta potuisse Virginem ab originali præservare.

Ad II. Scotus negat sequelam; & rationem his verbis adducit: *Quia abstrahentium non est mendacium*. 2. *Physic. non enim intellectus non intelligens hoc, intelligit non hoc; ut, non intelligens hominem esse animal, non intelligit ipsum non animal; quia tunc non posset esse abstractio sine mendacio, auferendo ab aliquo, quod sibi essentialiter inest*. Apud citatum Frassen allata verba leguntur.

Ad III. Dicitur, quod fuit debitum remotum, & hoc quidem est, quod B. Virgo habuerit carnem Adæ, sed per feminalem propagationem; Christus vero habuit carnem Virginis, sed non per feminalem propagationem. Debitum ergo remo-